

Memoria xustificativa do acordo de colaboración entre a entidade pública empresarial Augas de Galicia e a Sociedade Redes de Telecomunicación Galegas Retegal, S.A. para o desenvolvemento e despregue da rede dixital de piezometría da Demarcación Hidrográfica de Galicia-Costa do Subproxecto C05.I03.S13 do Plan de Recuperación, Transformación e Resiliencia, financiado pola Unión Europea-NextGenerationEU (AC25002)

1. Antecedentes

Augas de Galicia, entidade creada pola Lei 9/2010, do 4 de novembro, de augas de Galicia, cuxo estatuto foi aprobado polo Decreto 32/2012, do 12 de xaneiro, é unha entidade pública empresarial do sector público autonómico de Galicia, adscrita á Consellería de Medio Ambiente e Cambio Climático, con personalidade xurídica propia e plena capacidade de obrar para o cumprimento dos seus fins. Exercerá as funcións previstas no artigo 11 da mencionada Lei.

A sociedade Redes de Telecomunicación Galegas Retegal, S.A. (en adiante, Retegal), constitúe unha entidade das comprendidas non ámbito da Lei 16/2010, do 17 de decembro, de organización e funcionamento da Administración xeral e do sector público autonómico de Galicia, adscrita á Axencia para a Modernización Tecnolóxica de Galicia (en adiante, AMTEGA) a través da área de Sociedade Dixital, e creada para a prestación de servizos de telecomunicacións na Comunidade Autónoma de Galicia.

Creada mediante Decreto 58/1997, do 20 de febreiro, Retegal xestiona e explota infraestruturas, sistemas e servizos de telecomunicacións no ámbito territorial da Comunidade Autónoma. Así, constitúe unha sociedade mercantil pública autonómica, declarada medio propio instrumental e servizo técnico da Administración da Xunta de Galicia, que ten por obxecto, con carácter xeral, a realización, por si ou a través de terceiros, da xestión e mantemento das infraestruturas, sistemas e servizos de telecomunicación institucionais en Galicia.

Augas de Galicia conta cunha rede piezométrica formada por 33 puntos de control repartidos estratexicamente na demarcación hidrográfica de Galicia-Costa. Esta rede permite a monitorización periódica do nivel e da calidade das augas subterráneas, proporcionando datos fundamentais para a avaliación e xestión sostible destes recursos. A información obtida facilita a detección temperá de posibles alteracións nos acuíferos e contribúe á toma de decisións informadas en materia de planificación hidrolóxica e protección do dominio público hidráulico.

A participación de Retegal neste acordo de colaboración resulta plenamente xustificada pola súa condición de medio propio e instrumental da Xunta de Galicia, así como pola encomenda realizada pola AMTEGA en virtude da resolución do 22 de decembro de 2021 para o despregamento, operación, xestión e mantemento da rede galega de internet das cousas (iCousas).

Esta rede pública autonómica, con máis de 300 puntos de acceso e capacidade para xestionar máis de 300.000 sensores, cobre máis do 70 % do territorio galego e constitúe unha infraestrutura estratéxica para a prestación de servizos IoT no conxunto da Administración autonómica.

A integración da nova rede de sensores piezométricos nesta infraestrutura existente garante a compatibilidade tecnolóxica, a eficiencia na xestión dos datos e a continuidade dos servizos, evitando duplicidades e maximizando o aproveitamento dos recursos públicos xa despregados.



2. Obxectivos que se pretenden

Este acordo ten por obxecto a adquisición e instalación dunha rede de sensores para a monitorización dixital avanzada que proporcione datos en tempo real sobre o estado dos acuíferos no ámbito territorial da demarcación hidrográfica de Galicia Costa, así como a súa integración na rede iCousas.

A Rede Dixital de Piezometría de Augas de Galicia é unha infraestrutura chave para a monitorización de parámetros relativos á calidade e nivel das augas subterráneas en Galicia.

A implantación deste sistema achegará máis información técnica relativa á evolución de recursos hídricos, contribuíndo a mellorar a detección temperá de posibles variacións neles e asegurando un control sostible a longo prazo.

Ademais, establecer unha rede de monitorización avanzada que proporcione datos en tempo real sobre o estado dos acuíferos en Galicia a través da medición automática e periódica de parámetros relativos a auga subterránea poderá mellorar a información previa á toma de decisións en políticas de conservación da auga.

3. Oportunidade e xustificación da necesidade de colaboración

A Lei 14/2013, de 26 de decembro, de racionalización do sector público autonómico, que ten como obxecto a racionalización de todo o sector público autonómico e da actividade administrativa e a adopción de medidas dirixidas a unha maior eficiencia do gasto e a mellora da xestión do sector público autonómico, regula baixo estes preceptos a colaboración no ámbito do sector público autonómico.

En concreto, o artigo 8 desta lei regula a autoprovisión de bens e de servizos dentro do propio sector público, segundo o cal a Administración xeral da Comunidade Autónoma e as entidades instrumentais do sector público, coa finalidade do uso eficiente dos recursos públicos existentes, realizarán as tarefas de interese público que lles corresponden cos medios persoais, técnicos, materiais e de calquera outro tipo dos que dispoña o sector público autonómico.

Para estes efectos, cando os medios dos que dispoñan resulten insuficientes para o cumprimento e a realización dos seus fins institucionais, acudirán con preferencia á cooperación, colaboración e asistencia doutros órganos da Administración xeral da Comunidade Autónoma ou doutras entidades do sector público autonómico que si dispoñan dos medios dos que precisan.

Ademais establécese que se elaborarán, nos termos previstos no artigo 9 do mesmo texto legal, catálogos de medios e prestacións susceptibles de ser obxecto de cooperación, colaboración e asistencia no ámbito interno do sector público autonómico.

Neste sentido, na redacción do presente acordo tívose en conta o disposto no Acordo do Consello da Xunta do 18 de setembro de 2014 polo que se aproba o Catálogo de medios e prestacións susceptibles de autoprovisión e se toma razón das subministracións, obras, servizos e calquera outra prestación susceptible de contratación centralizada.

En consonancia co exposto, o artigo 14 da Lei 14/2013, do 26 de decembro, de racionalización do sector público autonómico establece a posibilidade de que a Administración xeral da Comunidade Autónoma de Galicia e as entidades do sector público autonómico formalicen acordos de colaboración ou cooperación para o servizo aos intereses xerais mediante o desempeño conxunto de tarefas de interese público da súa competencia.



Neste sentido, este acordo de colaboración non vulnera o principio de concorrencia, ao tratarse dunha actuación amparada no disposto nos citados artigos 8 e 14 da Lei 14/2013, do 26 de decembro, de racionalización do sector público autonómico, e polo artigo 8 da mesma norma, que establece a preferencia pola cooperación e autoprovisión entre entidades públicas cando existen medios dispoñibles no sector público autonómico. Neste caso, a elección de Retegal responde non só á súa condición xurídica, senón tamén á súa capacidade técnica e funcional acreditada como responsable da rede iCousas, a través da cal se vehiculiza o servizo obxecto deste acordo, mediante a adhesión ao encargo e o abono da correspondente cota por sensor.

Polo exposto, estímase xustificada a utilización do instrumento do acordo para articular a colaboración de referencia, quedando este fóra do ámbito de aplicación da Lei 9/2017, de 8 de novembro, de contratos do sector público, de acordo co establecido no artigo 6 da antedita lei.

4. Estimación de custos e financiamento

A realización das actividades obxecto da colaboración ten un custo estimado de trescentos oitenta e cinco mil trescentos sesenta e nove euros con cincuenta e cinco céntimos (385.369,55 €) incluído o Imposto sobre o valor engadido (IVE), segundo o detalle que se recolle no *Anexo II. Detalle de custos*, e realizarase con cargo á conta 215 "Aplicacións informáticas" do Plan xeral de contabilidade pública de Galicia coa seguinte distribución de anualidades:

ANUALIDADES	IMPORTE SEN IVE	IMPORTE DO IVE	IMPORTE TOTAL
2025	156.027,99 €	32.765,88 €	188.793,87 €
2026	162.459,24 €	34.116,44 €	196.575,68 €
TOTAL	318.487,23 €	66.882,32 €	385.369,55 €

O gasto en concepto do IVE non será subvencionable con fondos MRR e será financiado por Augas de Galicia con fondos propios.

A execución deste acordo será financiada cos fondos do Mecanismo de Recuperación e Resiliencia (MRR) dentro do marco do Plan de Recuperación, Transformación e Resiliencia- Financiado pola UE- NextGenerationEU (PRTR), na Política Panca II "Infraestruturas e ecosistemas resilientes"; Compoñente 5 "Preservación do litoral e recursos hídricos"; Medida: Investimento 3 (C5.I3) "Transición dixital no sector da auga (vixilancia e control do entorno dixital)"; fito nº 426 "Posta en funcionamento de ferramentas para mellorar o coñecemento e o uso dos recursos hídricos, e para rexistrar as precipitacións e outros datos meteorolóxicos".

Respectaranse, polo tanto, as normas de subvencionabilidade do gasto do Plan de Recuperación, Transformación e Resiliencia de España, que conta con financiamento do citado mecanismo europeo, así como as normas de información, publicidade e identidade visual establecidas no



Reglamento (UE) 2021/241, na Orde HFP 1030/2021 e nas demais normas comunitarias que sexan de aplicación.

Augas de Galicia poderá compensar con cargo á anualidade 2026 os gastos realizados no mes de decembro da anualidade 2025.

Este acordo contribúe a mellorar a eficiencia da xestión pública, a facilitar a utilización conxunta de medios e servizos públicos e á realización de actividades de utilidade pública.

Santiago de Compostela, na data da sinatura electrónica

O director de Augas de Galicia

Roi Fernández Añón

